

**Date – 21/07/2025**  
**Time - 7:30 -7:40Hrs**  
**AKASHVANI AIZAWL**

**REGIONAL NEWS BULLETIN**

**HEADLINES (MORNING)**

- 1. Rajya Sabha MP Pu K. Vanlalvenan Aizawl leh Delhi inkar thlawhna chuan man to lutuk chu All Parliamentary Floor Leaders inhmuhkhawmna-ah a sawi.**
  
- 2. Mizoram chak lak luhna kawngpui NH 306 a chhiat avanga tuialhthei phurte an tlan ngam loh avangin Aizawlah petrol leh diesel a vang tawh hle.**
  
- 3. Parliament fur thutkhawm chu vawiinah tan a ni dawn.**
  
- 4. Parliament thutkhawm neih turah sawrkar chuan ramchhung thil pawimawh chi hrang hrang sawiho turin a inpeih tih a sawi.**

<><><>

**MP ON AIR FARE**

**Rajya Sabha MP Pu K. Vanlalvena chuan Aizawl leh Delhi inkar thlawhna chuan man to lutuk chu nimin khan Delhi-ah a sawi chhuak.**

**Vawiin atanga Parliament in 2 Fur thutkhawm tan tur inbuatsaihna a nimin chawhma lama All Parliamentary Floor Leaders inhmuhkhawmna-ah Pu K. Vanlalvena chuan he thu hi sawiin tun thla ni 9 khan Aizawl atangin Delhi ah a chhuk a. Indigo airlines-ah chuangin thlawhna ticket man hi Rs 25,951 zet a nih thu leh chu chu Delhi leh Indonesia khawpui Jakarta thlawhna chuan man ai pawha to zawk a nih thu a sawi chhuak a. Chubakah kum tinin Christmas dawn December thla bawr chhovah thlawhna ticket man Delhi leh Aizawl inkar hi Indigo Air service ten an tih sân bik ziah thu a sawilang bawk a. Sawrkar laipui hnenah he harsatna hi sutkian sak turin a ngen a ni.**

<><><>

**PM-DAJGUA**

**Chief Minister Pu Lalduhoma'n PM DAJGUA chu Mizoramah tha taka kalpui niin Department hrang hrangah hmalak a ni a ti a, mipui tam thei ang ber a huam thei na'n MLA bialah hmalakna kalpui a ni a ti bawk.**

**Chief Minister chuan Dharti Aaba Janjatiya Gram Utkarsh Abhiyan hnuaiah chuan Sawrkar Department 14 a awm tih sawiin Department 14 te hnathawh hrang hrang chu Planning Department atangin khaikhawm vek a ni a ti a, hmasawna chak zawka a awm theih nan Mizoram MLA bial tinah**

MLA-te'n mipui zirtir kawngah tan an la tih sawiin Department hrang hrangah hmalak a ni a ti bawk.

He ruahmanna hian ei leh bar zawna leh khawtlang dinhmun chawikan te, ei/in tha leh zirna tha te, inkal pawhna thate, in leh lo tha zawk pek te a tum a ni a, he ruahmanna chungchangah hian Planning & Programme Implementation Department-a Deputy Advisor Pi Biakthansangi Hrahsel thusawi i lo ngaithla ang u.

<><><>

#### OIL SCARCITY

Mizoram chak lak luhna kawngpui NH 306 a chhiat avanga tuialhthei phurte an tlan ngam loh avangin Aizawlah petrol leh diesel a vang tawh hle.

Aizawl khawpui chhunga Filling station hrang hrangte'n petrol leh diesel hralh chhuah tur an nei mumal tawh lo a, nimin khan tuialhthei tlem a zawng lo thleng awmin filling station thenkhatah pek a ni a, petrol leh diesel laktuma intlar an tam hle a ni. Filling station thenkhat chuan tanker rawn thleng a awm leh zauh zauh thin avangin hralh tur chu an la nei niin an sawi a, filling station thenkhat bulah man to zawka petrol a hralh chhuak an awm reng bawk. Kawnpui Police station atanga thu dawn danin Inrinni zan lam khan truck tangkhang eng emaw zat chu Aizawl lam panin rawn chhuah a ni a, hetih lai hian Kawnpui leh Sairang inkarah lirthei, bungraw phur leh dahzo tawh let leh tum tangkhang an la tam hle nia thu dawn a ni bawk. Food, Civil Supplies & Consumer Affairs department hotute chuan kawng chhiaah tuialhthei phur tangkhang an tam avangin petrol leh diesel thleng tha lo mah se tuialhthei chu lut lo tawp a ni lo tih an sawi a, nimin lam khan Aizawla filling station zawng zawnga tualhtheih awm dinhmun tarlangin, diesel khawl sa litre nuai 1 chuang a awm tih leh, petrol pangngai pawh lirthei nuai 1 vel a awm thu an sawi a, petrol HP pawh litre sing 8 vel khawl sa awm meka ngaih a nih thu an sawi bawk. Filling station zingah tuialhthei sing chuang la nei mekte an awm avangin mipui tan chia i hluaina tur a awm rih loah an ngai bawk a ni.

He tih lai hian Aizawl leh Silchar inkar kawngpui National Highway a chhiat lutuk avang hian mipui nitin mamawh bakah bungraw dang phur truck-te pawh ke kawngpui a kal hi an tlem tawh hle a. Mizoram Truck Owners' Association (MTOA) general secretary Pu Dina Tlau chuan an member hmun thuma hmun hnih vel chu helai kawngah hian bungraw phurin an kal tawh lo niin Akashvani Aizawl a hrilh. He lai kawng hi a hlauhawm lutuk tawh a, tlan aini din a hlawk tawh zawk niin Pu Dina Tlau chuan a sawi a ni.

<><><>

#### CYBER CASE

Chief minister hlui Pu Zoramthanga thah tuma puh, social media hmanga voutu ni a hriatte chu finfiahna tha tawh a awm loh avangin court-in a chhuah.

Aizawl district-a judicial magistrate first class chuan he thubuai-ah hian Nilaini khan thutlukna siamin CM hlui thah tuma social media kaltlanga vauna ziaka puh Rodinliana (39) Khawzawl Hermon veng leh Chanchinmawia (49)

Hnahthial Lungleng vengte chu a chhuah zalen a. Cybercrime Police Station Aizawl ami he thubuai chhui chiangtute thil hmuh dan leh thuhretute bakah CM hlui thaha vautre thusawi a ngaihthlak hnu-ah judicial magistrate chuan rinhlelhna awm mah se, rinhlelh rual lohva an tih ngei a ni tih finfiahna a awm theih loh avangin thil tisuatu a puhte hi a chhuah ta a ni.

Kum 2022 March ni 11 khan Facebook Zoram Politics Group-1 ah mi pakhat chuan kha tih laia CM Pu Zoramthanga chu thaha a vau avangin hemi kum vek April ni 12 khan Aizawl a Cybercrime Police Station-ah FIR thehluh a ni a. Cybercrime Police station a thawkte hian an chhui nghal a. Facebook-a an ziah dan chuan lehkhathiam mi 5 intelkhawmin silai kap thiam an rawih thu leh CM chu hmasawna hna ti thanthutu a puhin thla thum chungna a nihna a bansan loh chuan an thah tur thu an ziak a ni.

Cybercrime Police-te chuan Google leh Facebook law enforcement team hnena atanga finfiahna awm thei la chhuakin an chhui zui a. An chhuina-ah hian Rodinlana chu manin a mobile phone pawh chhuhsak a ni a. Rodinlana thurualpui ni a hriat, Facebook-a 'CC Azyu' ti a hming invuah ni a rinhlelh Chanchinmawia chu man leh a ni a. An mi man pahnihte erawh chuan hei hi an tih a nih loh thu sawiin an pha a ni.



#### COVID SITUATION

Tun dinhmunah Mizoramah Covid hri kai mi 1 a awm mek a, kumin chungin Covid hri kai mi 12 an awm tawh a, mi 11-te chu enkawl dam an ni tawh.

Health & family welfare hnuai a integrated disease surveillance programme (IDSP) thuneitute sawi danin kar kal ta Ningani khan Covid hri kai ni a rinhlelh mi 8 an endik zinga 1 chuan hri a kai tih hmuhchhuah a ni a, hemi hnu hian mi 10 endik leh an ni chungin hri kai hmuhchhuah an awm tawh rih lo. Mizorama kumina hri kai awm tawhte hi hri kai tih lang chhuak nasa an awm lova, damlo na tak leh enkawl zui ngai lutuk an awm baw lo niin an sawi. Mizoramah hian kumina Covid hmuhchhuah leh hmasak ber chu May thla laihawla mi 2 hri an kai tih hmuhchhuahte kha an ni a. Anni dawtah hian June thla chho khan hmuhchhuah leh an awm baw.

Covid hri len vanglai, kum 2020 March thla chawhnu lam atanga intan kha nikumah kha chuan a zia-awm hle tawh a. Mizoramah chuan nikum chungin khan Covid hri kai mi 74 an awm a, October thla atanga kumin May thla laihawl thleng khan hri kai hmuhchhuah an awm lo. Covid hri leng avangin khan Mizoramah mi 734-in an thih phah a, kum 2021 kha thihpui tam ber kum niin mi 538 an thi a ni. Kum 2020 khan mi 8 an thi a, kum 2022 khan mi 180 thi-in kum 2023 khan mi 8 an thi leh a ni.

Mizoramah tun thleng hian Covid hri kai leh kai lo sample nuai 19, sing 9, sang 7 leh 787 endik a ni tawh a, an zinga mi nuai 2, sing 3, sang 9 leh 647-te chuan hri an kai tih hmuhchhuah a ni a, mi 734-in thihpui-in mi nuai 2, sing 3, sang 8 leh 912 te chu an dam chhuak leh a ni.



## AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



## PARLIMENT

Parliament fur thutkhawm chu vawiinah tan a ni dawn a. Thlaleh August ni 21 thleng neh tur a ni. Sawrkar chuan session neih tur pual hian nimin khan Political Party tin aiawh inhmukhawm a ko a. He inhmukhawmah hian sawrkar chuan ramchhung thil pawimawh chi hrang hrang sawiho turin a inpeih tih a sawi a. Parliament in hnih rorelnaah opposition memberte chu thawhpuiawh sawrkarin a sawm bawk a ni.

Nimin inhmukhawm hi Union Minister leh Rajya Sabha House leader JP Nadda chuan a kaihruai a. Union Parliamentary Affairs minister Kiren Rijiju, Congress atangin Gaurav Gogoi leh Pramod Tiwari, NCP-SCP atangin Supriya Sule, DMK atangin Tiruchi Siva, Samajwadi Party atangin Ram Gopal Yadav, DMK atangin T R Baalu leh AAP atangin Sanjay Singh te pawh an tel a ni.

Inhmukhawm zawhah chanchinbumite zawhna chhangin Union Parliamentary Affairs Minister Kiren Rijiju chuan Operation Sindoor tiamin ramchhung thilthleng pawimawh sawiho turin sawrkar chu a inhawng reng tih a sawi.



## PM

Prime Minister Narendra Modia chuan ram pahnih United Kingdom leh Maldives tlawh turin tunkar Nilaini hian a zinchnuak dawn. A thawhkhatnaah hian PM Modia hian UK ah ni hnih a cham ang a. Hemi chhung hian UK-a a thawhpui PM Keir Starmer nen an inkawm dawn a. Hei bakah hian King Charles III a hmu bawk ang. A thawhnhinaah hian Pu Modia hian Maldives ah ni 2 a cham ang a. Maldives zalenna kum 60 lawmna a hmanpui ang.

